

Departamento di Cultura Aruba cu su

Proyecto 'Biografia di Artista di Musica Arubano'



SECCION di Investigacion y Documentacion (SID), di Departamento di Cultura Aruba (DCA) bou auspicio di Ministerio di Cultura a haci un presentacion di un proyecto cu e nomber 'Biografia di Artista di Musica Arubano'. Esaki a tuma luga riba e dia di e patrona di musica Santa Cecilia, na Biblioteca Nacional Aruba den sala di Diamante. Diesdos artista a ricibi un parti di nan biografia, hunto cu grabacion di nan entrevista, un pin di Aruba, como gesto pa participa den e proyecto y reconocimiento pa nan contribucion na Aruba su cultura musical. Por ultimo nan a ricibi un recuerdo den e cuadro di 40 aña di existencia di Departamento di Cultura Aruba. Minister di Cultura Sra. mr. Xiomara Ruiz-Maduro a disculpa su mes cu pa motibo imprevisto no por tabata presente. Minister di Enseñansa, Ciencia y Desaroyo Sostenibel, sr. dr. Armando Lampe tabata presente y a hiba palabra den nomber di Gobierno di Aruba.

Meta di e Proyecto aki ta:

Mirando e necesidad pa rescata informacion cu ta regarda musica a yega na e conclusion pa bin cu e proyecto aki cu e nomber 'Biografia di Artista di Musica Arubano'. Un proyecto pa salvaguardia informacion importante di tanto e logro di e artista y su trayectoria musical. E proyecto a ser concipia for di 2014 caba y cu a keda presenta den e rondanan di consulta, den e cuadro di maneho di DCA. Departamento di Cultura Aruba y Ministerio di Cultura a aproba e proyecto pa duna oportunidad na e comunidad Arubano p'asina haya sa mas di nos artistanan di musica, y tambe nos herencia cultural rescata. Di e manera aki pa hoben cu lo desea di haci uzo di e informacion y cu por forma parti di nan estudio. Tur investigacion a ser haci den e forma di historia oral a base di entrevista. E idea ta pa entrevista cuarenta artista cuminsando cu esunnan di edad mas halto cu trayectoria largo. A sigui cu diesdos entrevista den e fase dos aki. Na final e lo bira un buki di 'Biografia di Artista di Musica Arubano'. Tambe lo trece esaki na conocimiento di nos hoben na un forma di presentacion na scolnan y informa e importancia di e trabou di e investigacion realisa.

Un persona cu sigur Departamento di Cultura Aruba ta gradici un biaha mas ta sr. Tino Ruiz cu boluntariamente a ofrece pa haci coreccion di cada biografia cual nos ta aprecia. Y tambe na tur e otro coleganan cu tanto a yuda den e parti

di transcripcion, loke nos ta aprecia.

E actividad aki a tuma luga na Biblioteca Nacional Aruba riba dia 22 di November 2018, Dia di Santa Cecilia, e dia di e Patrona di musiconan. Durante e actividad colega Stanley Dabian, PR y Comunicacion a hiba palabra di bon bini y a elabora riba e dia tan special aki. Director sr. drs. Siegfried Dumfries a hiba palabra riba contenido di e proyecto y Minister di Enseñansa, Ciencia y Desaroyo Sostenibel, sr. dr. Armando Lampe a duna su discurso di sosten y gradicimento. Na final Chencho Kelly y Johnny Scharbaay, Lideranan di Investigacion di Musica na Seccion di SID a haci entrega di e parti di biografia hunto cu un grabacion di entrevista mas un pin di Aruba, como gesto di a participa na e Proyecto y reconocimiento pa nan contribucion na Aruba su cultural musical. E pin a ser poni pa Su Excelencia Minister, dr. Armando Lampe. Tambe nan a ricibi un regalo den e cuadro di 40 aña di existencia di Departamento di Cultura Aruba. Maybelline Arends-Croes a ricibi for di man di director di DCA, drs. Siegfried Dumfries un boket di flor pa su contribucion di 50 aña na Aruba su cultura musical.

Departamento di Cultura Aruba ta gradici tur e Artistanan participante hunto cu na famia, Biblioteca Nacional Aruba, Michelangelo Koolman cu su tremendo presentacion, y animacion durante e atardi aki, sigur tambe na tur empleadonan di DCA.

Nomber di artistanan cu a ser entrevista den fase 2 ta lo siguiente:

1. Aura Maybeline Arends-Croes (Maybe)
2. Vicente Fortunato Kelly (Vicente)
3. Hyacinto Victoriano Giel (Casin)
4. Hendrik Ramiro Hernandez (Ramiro)
5. Mario Andres Reginaldo Steenen (Mayon)
6. George Andres Viguier (George)
7. Luisito Rudolf Olive (Roy)
8. Roland Narcisio Kock (Chicho)
9. Vicente Hyacinto Tromp (Chito)
10. Arturo C. Herrera (Tuyo)
11. Maximiliaan Thomas Rigard Hassell (Max)
12. Hector Mario Quilotte (Tico)